

左文襄公奏疏

第二函
十冊

左文襄公奏疏續編目錄

卷七十二

酌定西甯留防礮隊餉章摺

護送常清明緒遣骸回旗片

籌借商款以濟要需摺

查獲逆財以充公用片

覆陳新疆情形摺



左文襄公奏疏續編卷七十二

酌定西甯留防礮隊餉章摺

光緒四年七月初四日

奏爲酌定西甯留防礮隊餉章仿照土勇營制支發以歸核實恭摺具陳仰祈

聖鑒事竊臣等准前

任西甯辦事大臣豫師咨開本年三月十六日奏陳西甯撤防籌商布置地方事宜一摺奉

旨知道

了著豫師咨行山東巡撫每年撥銀一萬兩解交左宗棠轉解西甯以資應用戶部知道欽此欽遵恭錄

咨行前來臣等查豫師移交西甯留防開花洋礮護勇員弁二百四員名歲只餉銀一萬兩自不能按照

楚軍餉章支發當卽咨商照土勇營制核定計歲支九千一百餘兩尙餘銀八百餘兩可作爲製造火藥

旗幟並修整軍械之需惟遇閏年應支銀九千九百餘兩則製造各項實有不敷自當極力撙節隨時彌

補所有此項員弁勇丁薪糧餉銀概自本年四月十一日臣福裕接印之日起支惟山東搭解餉銀遲速

難定而勇丁計口授食必須按月支領應由臣宗棠按月挪墊撥解以資散放山東餉銀解到隨時劃還

清款此項餉銀槩由山東解交臣宗棠轉解所有支發報銷應於年終由臣宗棠核明礮隊留防軍餉一

併報部臣福裕毋庸另報以歸劃一而免紛歧除將此項員弁勇丁應支餉銀數目造具簡明清冊咨明

戶部立案外所有酌定西甯留防礮隊支發餉章緣由謹合詞恭摺具奏伏乞 皇太后 皇上聖

鑒訓示施行謹 奏

軍機大臣奉 旨知道了欽此

護送清明緒遺骸回旗片

光緒四年七月十一日

再據署烏魯木齊提督金運昌牘稱故前任伊犁將軍臣常清明緒二員從事邊疆服勞盡節俱已仰蒙優卹惟其骸骨尙滯伊城未知葬所上年十月間故都統英翰派委分省補用同知直隸州知州田立愔安徽候補守備高福秀前赴伊犁偵探情形密飭就便訪尋常清明緒掩埋處所茲據該委員等自伊犁回至烏城稟稱到伊犁後訪得故前任將軍常清遺骸在金頂寺官菜園中經營時收埋之纏回呼大拜的罕布拉等指認確鑿啟土驗視屍軀腐化並骨殖亦不完全緣菜地屢經鋤墾無從辨認拾取也又於伊犁大城中覓故將軍明緒並其妻室及二子葬所據錫伯營署總管防禦阿木昌阿及官兵庫爾都勒等僉稱前將軍明緒於城陷時與其妻命婦聚存餘藥桶引火自轟先揮其兩子出城逃生兩子依戀不去火發一併焚死情事慘烈旋蒙署錫伯營領隊大臣喀爾并阿密派該員弁等於燼灰中檢其遺骨埋大城中緣因火藥轟折骸骨不完倉卒收瘞未遑排檢高福秀等照所指處所啟驗一一符合檢盛木匣護回烏城金運昌仍派該守備高福秀隨英翰遺櫬護送進關六月初一日行抵肅州臣飭換常清一棺明緒一棺明緒之妻及兩子共一棺率僚屬祭奠如禮令高福秀護隨英翰遺櫬回旗並飭甘肅臬司發給勘合令陝西山西直隸沿途各地方一體照料惟臣行營未帶案卷於常清明緒死事年月及係何旗

佐明緒之妻命婦何氏及隨殉兩子何名均無從查悉伏乞 飭下該部該旗於常清明緒及明緒妻室兩子三棺回旗時行知該各親屬領歸安葬以妥忠魂謹附片陳明伏乞 聖鑒訓示施行謹

奏

軍機大臣奉 旨另有旨欽此

籌借商款以濟要需摺

光緒四年八月十六日

奏爲餉源已涸籌借商款仿照成案請 旨飭下各海關出票各省督撫蓋印速交上海採運局道員

胡光墉交收催取以濟要需恭摺馳陳仰祈 聖鑒事竊臣於光緒三年五月奏准借洋款五百萬兩

洋款到時劃還借欠各款外賸存無多本年三月內曾縷陳一切並請 飭下山東撫臣文格將應協

之款提前四年起解廣西無應協 軍之款請 飭令撫臣楊重雅提銀一百萬兩解濟 軍臣仍由

湖南西征的餉分年解還歸款初意山東廣西以無息庫款借濟 軍本無所損臣借無息庫款暫濟軍

用則實有益疆 義在奉公固無眚域可言也旋准山東撫臣臧釐允提前速解銀三十萬兩尙是大宗

廣西則隻字不覆頃始接楊重雅來文解銀八萬兩而急於索還不容分年歸款則借與不借等耳入款

之可考者如此上年久旱成災山西河南外陝次之甘又次之除本省賑務現飭造報容卽具奏外山西

河南應協 軍之款既請停緩而該兩省常年應協各軍款項如張曜金運昌兩軍歲均以數十萬兩計

兩省既無可解均須由臣墊發義不容辭陝西除酌提軍餉接濟外其常年應協蜀軍月餉又須由臣籌墊軍餉因災受累固勢所必至也金順一軍本有專餉近因協款稀至窘感日甚臣又不得不代籌挪墊於萬難設湊中撥現餉十二萬兩以濟要需此外各處零星點綴尙難悉數出款之約略可考者如此臣與劉典熟商餉之源既無可開宜急節其流勉支此局遂議裁併征營改防營行餉爲坐餉然裁併征營其遣撤員弁勇丁長夫應發給實餉按照一營計算動需數萬兩防營議改坐餉其撤遣員弁勇丁長夫仍須照未改章之先發餉統計須現銀百數十萬兩如果各省均按照定章八成以上依時起解則通融挪墊尙資敷衍乃自春夏以來各省協解之款不及從前踴躍頻催罔應盼切成空業由陝西撫臣開單彙奏在案劉典緘商後路糧臺道員王加敏息借漢口商號銀四十萬兩又借蘭州票號銀四萬兩勉強支持暫應目前之急現在新疆正議開設行省需用浩繁尤苦經費無措臣前因山東廣西庫款未能應手卽緘商上海探運局道員胡光墉囑其向華商議借巨款並准照泰西章程設立公司洋行糾集衆商湊貲待借意楚弓楚得利益歸之中華而取攜又較便也旋據胡光墉覆稱卽日赴滬創設乾泰公司招集華商議以五千兩爲一股聽華商各自摒湊合成鉅款以待而華商復以商與官交事屬創行終多疑慮爲詞經胡光墉再三譬曉以來札准一切照洋款成案事本一律別無可疑各華商雖允以一百七十五萬兩出借而心尙猶豫未能釋然維時匯豐洋行商人見創設乾泰公司已有成議自請以洋款一百

七十五萬兩附入華款出借合成三百五十萬兩不居洋款之名胡光墉比以來札設立公司係專指華款如歸入洋款未免歧互與札意不符婉詞回覆而洋商又稱此次如允洋商附股並可不由總理衙門暨稅務司行文印押以免周折胡光墉察其情詞真切並可使華商釋然無疑遂飛稟請示一面查照向章各備信銀交存公司定議按月一分二釐五毫起息由粵海江海關海江漢五關出票督撫蓋印六年本息齊還清款每年兩次每次以六箇月爲一期以六年十二期合計每年需銀五十餘萬兩五關勻攤每關每期不過增銀數萬兩並清還前次借用洋款本息均仍由各省應協西征餉項內劃抵初議六月二十日爲期銀票兩交繼議展至九月二十日兌銀交票請示前來臣維此次議借華商巨款本擬停借洋款以息羣疑洋商之聞風堅請附入華款出借實出意外然既由洋商自願撥湊附股實非華商招致而來且據匯豐洋行自請不必總理衙門暨稅務司行文印押可省周折與華款無所區分似其傾誠許與出自本懷非圖分華商息銀起見而華商以洋商附股益堅其信可期迅速集事現值新疆擬置省分設郡縣已有成議一俟借款解齊便可次第開辦不至稽延一時所耗息銀尙少而將來所省良多伏懇天恩飭下各將軍督撫監督查照向章出票蓋印交胡光墉祇領遵辦俾得所藉手迅赴事機大局之幸亦微臣之幸也至各省應協臣軍及新疆各軍餉需款項並請飭部嚴切查催報解庶免延誤牽掣之虞愚昧之見是否有當謹據實馳奏伏乞

皇太后

皇上聖鑒訓示施行謹

奏

軍機大臣奉 旨該衙門速議具奏欽此

查獲逆財以充公用片

光緒四年九月二十四日

再臣准總統老湘各軍通政司使通政使二等男臣劉錦棠咨稱上年官軍進抵喀什噶爾後安集延會伯克胡里即攜眷遠颺各城夷黨亦多聞風逃走所遺銀物比飭各營局一律查追呈繳以充公用嗣據各營局先後追繳前來僉稱此次所獲逆財有得自伯克胡里發與商民營利者有因官軍到境倉皇委棄者且有各頭目報明窖藏所在因而掘獲者亦有懷德畏威甘以呈獻者計提督李克常由阿克蘇繳到湘平銀二千五百七十兩六錢四分提督李泗益由喀什噶爾繳到湘平銀九千五百三十兩一錢七分提督張俊由英吉沙爾繳到湘平銀一千三百二十五兩六錢六分提督譚拔萃由葉爾羌繳到湘平銀八千二百三十肆兩三錢肆分提督董福祥由和闐繳到湘平銀三萬二千五百一十八兩七錢五分又署葉爾羌阿奇木呢牙斯呈繳前在和闐挖出安夷窖銀按照湘平計共重二萬零八百一兩三錢除提賞呈繳逆財各頭目人等銀四千八百二十七兩外實共收到湘平銀七萬零一百五十三兩八錢六分提充公用等因呈請查核前來臣維新疆南路現正設立總分各局籌辦善後一切事宜頭緒紛繁經費甚鉅沿途安設台站馬撥驛書人等口糧工料亦須急為籌發飭均在於所獲逆財項下動支核實開

報理合附片陳明伏乞

聖鑒謹

奏

軍機大臣奉 旨知道了欽此

覆陳新疆情形摺 光緒四年十月二十三日

奏爲遵

旨覆陳仰祈

聖鑒事竊

臣於十月十三日承准軍機大臣字寄光緒四年九月三十日

欽奉

上諭一道跪聆之餘敬悉

皇太后

皇上保大定功慎終如始審時度勢策及萬全至

意敢不畢獻其愚仰俟

聖明採酌伏讀

諭旨伊犁在昔爲西路第一重鎮俄人交還以後如何

防守未交以前如何布置伊犁九城縱橫相聯大城西南北三面舊有卡倫距俄境若干道路俄軍紮至

何處金順現駐庫爾喀喇烏蘇前隊西至何處 臣謹接俄人自據伊犁於西面舊有拱宸瞻德廣仁塔勒

奇四城均棄而弗守傾圯殆盡綏定一城近以之雜置陝回距伊犁僅三十里伊犁大城人煙甚少俄兵

及商戶均萃居東面惠甯熙春甯遠三城而金頂寺煙戶尤多伊犁管事俄官名馬依爾品秩不過中國

同知通判之類主伊犁之事者七河巡撫也七河一作七水其官爲固必納三爾其名爲喀爾帕科斯克

依所駐阿爾瑪圖地屬俄境在伊犁西八百餘里其兼轄之官名圖爾齊斯坦總督名爲克復滿亦呼高

伏滿自稱代國大臣駐浩罕故都搭什干城距我喀什噶爾不過數十程由喀什噶爾至俄邊納林河中

隔俄屬布魯特部喀城馬行六日可至從前伊犁本不與俄境相連以哈薩克布魯特種人與浩罕所部

安集延及布噶爾所屬爲之隔閼近年俄人先後脅誘哈薩克布魯特種人又攻奪浩罕三部據其都城

而浩罕屬安集延亦隨風而靡故我北路伊犁南路喀什噶爾之邊境皆與俄屬相接距俄境亦近也伊犁收還以後應於邊境擇要築壘開壕安設大小礮位挑勁兵以增其險至伊犁大城西北之塔勒奇廣仁瞻德拱宸各城戶口鮮存水草却便應各擇要隘暫駐各營分屯其間所有旗綠各營剩存兵丁各給牛種牲畜督令游牧耕墾舊有城堡緩議修復尙非不可大城以東惠甯熙春甯遠各城民戶商戶願遷徙者遷徙願歸業者歸業邊圍既奠人安其土耕其野而出其途者不待招徠迥非甘肅從前東路西路數百千里蒿萊滿望杳無人煙難於措置可比若烏魯木齊所屬各城相距甚遠難於照料此伊犁收還以後情形也伊犁未還之前金順大軍駐庫爾喀喇烏蘇其西精河地方勢處要隘向駐馬隊以資扼截自福珠哩歸後金順未及派紮填防致被漢回侵掠金順旋派馬隊二百前往填防當可無虞由精河西行一日爲永集湖再西數十里卽伊犁俄官所設之頭卡三日卽抵伊犁中間山徑五道可達伊犁不由惠甯熙春甯遠三城經過然巖谷幽邃僅容一人一騎行走不能通車若收還伊犁則驛道山徑皆成腹地此形勢變遷俄人現在布置官軍防守及距伊犁道里遠近大略也 諭旨郡縣之制以民爲本現由嘉峪關烏魯木齊至庫爾喀喇烏蘇迤西商戶回戶各存若干由吐魯番至南八城纏頭共存若干除舊有各廳州縣外其餘各城改設行省究竟合宜與否倘置郡縣有無可治之民不設行省此外有無良策臣謹按新疆之變起於北路迪化失守所屬相繼淪陷戶口傷亡最多漢民被禍尤酷以逆回仇視漢

民故也比大軍進剿連拔堅城而昌吉呼圖壁綏來回民又因畏剿逃奔南路煙戶頓減克復以來還定安集招徠開墾戶口漸增迪化州各屬尤成效可觀舊額民戶共四千二百有奇現報承墾者已三千六百餘戶昌吉縣民戶舊共三千九百有奇現報承墾者僅四百數十戶阜康縣民戶舊有三千九十餘現報承墾者僅二百一十餘戶綏來縣民戶舊有三千七百餘現報承墾者八百五十餘戶奇臺縣舊有民戶四千三百六十有奇現報承墾者五百七十餘戶濟木薩縣丞所屬舊有民戶二千八百有奇現報承墾者三百五十餘戶呼圖壁巡檢所屬舊有民戶一千七百三十有奇現報承墾者二百八十餘戶庫爾喀喇烏蘇舊有民戶僅八十有奇現報承墾者尙數十戶精河舊有民戶四千有奇現報承墾者一百餘戶鎮西廳戶口無考舊種地六萬畝現報民墾三萬六千餘畝兵墾四千餘畝土客漸增此北路民戶現存實數也久罹兵燹戶口凋耗無怪其然鎮迪一道所屬雖子黎僅存頻年散給耕牛種籽酌發賑糧廣示招徠自木壘河抵精河除戈壁外又均是腴區土客民人及遣散勇丁領地耕墾逐漸增加署鎮迪道周崇傳勤慎廉幹事必躬親漸有明效需之時日百堵皆興卽以目前論之亦非無可治之民也吐魯番舊隸鎮迪道荒地尙少現委道員雷聲遠署同知奎拔妥爲撫輯糧石租稅已逾舊額之半南八城除英吉沙爾壤地褊小烏什土性瘠薄餘均較吐魯番爲饒而喀什噶爾和闐葉爾羌阿克蘇庶而兼富物產豐盈又較各城爲盛劉錦棠張曜悉心經理現委員開河引渠清丈地畝修築城堡塘站鑄錢徵釐百廢

肇興具有端緒較之北路尤易爲功是南北開設行省天時人事均有可乘之機失今不圖未免可惜此新疆之應改省者一也北路得之準部南路得之回部皆因俗施治未能與內地一道同風久已概爲邊地伊犁設將軍又設參贊大臣一員烏魯木齊設都統塔爾巴哈台葉爾羌均設辦事大臣伊犁等處設領隊大臣五員塔爾巴哈台烏魯木齊庫爾喀喇烏蘇古城巴里坤吐魯番烏什英吉沙爾均設領隊大臣哈密設辦事大臣一員協辦大臣一員葉爾羌設兼管和闡事務協辦大臣一員烏什設幫辦大臣一員喀什噶爾設換防總兵一員是邊地腹地皆一律視之無甚區別與經野馭邊之義不符將軍都統與參贊辦事大臣協辦與領隊大臣職分等夷或皆出自禁闥或久握兵符民隱未能周知吏事素少

歷練一旦持節臨邊各不相下稽察督責有所難行地周二萬里治兵之官多治民之官少而望政教旁敷遠民被澤不亦難哉北路糧員但管徵收而承催則責之頭目南路徵收均由回目阿奇木伯克等交官官民隔絕民之畏官不如其畏所管頭目官之不肖者狎玩其民輒以犬羊視之凡有徵索頭目人等輒以官意傳取倚勢作威民之怨官不如怨所管頭目也內地徵收常制地丁合而爲一按畝出賦故無無賦之地亦無無地之賦新疆則按丁索賦富戶丁少賦役或輕貧戶丁多則賦役反重事理失平莫甚於此貨幣之制子母不能相權爭訟之事曲直不能徑達官與民語言不通文字不曉全恃通事居間傳述顛倒混淆時所不免此非官與民親漸通其情實去其壅蔽廣置義塾先教以漢文俾其略識字義徵

收所用券票其戶民數目漢文居中旁行兼注回字令戶民易曉遇有舛誤卽予隨時更正責成各廳州縣而道府察之則綱目具而事易舉頭目人等之權殺官司之令行民之情僞易知政事之修廢易見長治久安之效實基於此新疆之應改行省者二也夫立國有疆古今通義傳曰天子有道守在四夷周秦以前姑弗具論自漢以來通道始於張騫不能得月氏要領求馬繼以廣利不能下小國堅城漢於西域窮天下之力以務之卒有輪臺之悔故班固以爲得之無益棄之不爲損也今主棄地之說者祖之臣愚非不謂然顧斷斷於兵不可停地不可棄者蓋以地形無今昔之殊而建置則有因創之異窮變通久因時制宜事固有不容已者謹按新疆開拓肇自

高宗時移涼州西安熱河滿兵延安綏德甯夏興

安漢中西甯固原肅州河州安西綠營兵丁駐守南北兩路餉不外增各城養廉經費則以京口杭州等處出旗漢軍俸餉口糧馬乾及甘肅等處所減草料充之計內地每歲裁減之數共一百二十九萬兩有奇而劃抵新疆養廉經費一百零七萬八千四百餘兩外尙餘銀二十一萬一千五百餘兩不特無壓餉之餘且有節餉之實論者竊以耗中事西疑之於

聖意拓邊節餉固無當也臣自度隴以來卽留心

稽考甘肅新疆餉數僉稱承平時每歲約銀五百餘萬兩自變亂以來冊籍散佚難以覆按請部鈔示成案亦無以應近據藩司崇保詳稱查得道光二十七年甘肅口內外駐防滿州蒙古旗綠官兵應需俸餉紅白賞卹等項銀四百一十五萬二千三百五十三兩三錢九分九釐四絲一忽內先一年預撥銀一百

四十萬兩外銀二百七十五萬二千三百五十三兩三錢九分九釐四絲一忽由部臣照依估撥預撥完數以此準之甘肅新疆實餉五百餘萬之數雖無可考而一歲之中預撥正撥四百一十五萬有奇則有數可稽也臣竊度南北兩路如行清丈之法就畝徵賦仿什一之制而從寬定額民收十數分官徵其一以給軍食尙可有餘修渠濬流以備旱潦改鑄制錢以便民用設局徵釐以裕課稅創設義塾教之識字選調匠師教之藝事自季春至今次第經理甫有端緒容俟各處織牘取齊卽行具奏此外南北兩路物產尙有藥材皮張吐魯番之棉花和闐之玉庫車之金銅鉛鐵均應設籌及之是新疆利源非無可開也甘肅地處邊陲土曠人稀瘠苦甲於天下承平時錢糧徵收不及東南一大郡此其明徵亂後子黎皮骨僅存氣息僅屬雖頻年拊循休養漸有起色究之致力多而成功少者時地實有以限之通省舊設額兵太多全恃各省協款接濟自中原軍興各省未能兼顧於是回禍起新疆淪陷甘肅全省名雖僅存實則亡矣幸值聖明在上洞囑無遺移東南之餘財救西北之奇厄親賢夾輔內外一心先關內而後關

外次第圖之乃有今日不可謂非幸也此時所當亟籌者善後之策善後之策當規久遠利鈍所繫匪僅一時以甘肅與新疆並論新疆利源可開流亦可節甘肅則開源爲難而節流尙有可議從前額兵之多者一則轄疆與蒙部回番雜處兵少恐啟戎心一則新疆需由內地撥兵換防兵少難敷調派也若以現在局勢而言蒙部回番已就鈴束防營可以漸減前奏改行餉爲坐餉圖節勇餉爲復甘肅制兵之漸新

疆南北如置行省換防之制可以永停又擬節制兵之餉以紓各省協款之力也竊計甘肅新疆承平時預撥估撥餉銀四百數十萬兩俟伊犁收還每歲約可節省百數十萬兩後此利源日增餉更可減部臣可隨時察酌而任甘肅新疆之事者可隨時陳奏特恐非微臣所及見耳此統籌甘肅新疆節省餉需以規久遠之大略也

諭旨宜於萬難措施之中求一可進可退之計臣愚竊以爲新疆歲需餉銀二百數十萬兩甘肅歲需餉銀二百數十萬兩本是承平時部臣預撥估撥常例茲當全隴澄清西域收復之時照常指撥於部章並無不合承撥各省當亦無詞況承平時應撥數目內又可節省百餘萬兩此後經理得宜節省或尙不止此實於國家經出之費不無小補當亦部臣與疆圻諸臣所樂聞也臣於新

疆擬辦各事皆以利民裕

國爲主行省之改與否尙未奏奉

明旨而所籌者無論改省與否兩

不相妨可行則行可止則止進退尙屬綽然過蒙

聖明矜諒示以轉圜之機若不披瀝直陳上紓

慈念更何以自處至愚衷有未盡者不得不時陳明仰祈

垂察臣軍積欠之餉本八百餘萬兩頻

年陸續清釐截至光緒四年尙欠一百數十萬兩近因飭道員胡光墉息借商款遲遲未到劉典向蘭州

票號借銀四萬兩又飭後路糧臺道員王加敏息借漢商銀四十萬兩駐陝軍需局陝安道沈應奎息借

票號銀二十萬兩暫應急需合之關內外新欠餉項及遣撤勇餉又積至二百數十萬兩將來胡光墉解

到息借巨款除還陝鄂息借各款點綴新舊欠餉外所餘無幾縱極力劃留以備光緒五年應用之需夏

末秋初又將告罄前奉

諭旨嗣後無論何項急需不得動輒息借商款致貽後累敢不懷遵惟念甘

肅新疆軍務

臣

既未嘗劃款請餉而一切經費又未嘗另款請銷如果此次借用商款外省協餉均能

源源接濟

臣

猶可通挪展轉以期兼顧更何敢動輒息借商款干瀆

宸聰無如各省疆巨身在事外

但見西事速了此後需用或可稍紓而頻年悉索以供未免因煩生厭頻催罔應本屬人情之常而臣則

勢逼處此莫展一籌將有束手待斃之目可否仰懇

天恩飭下軍機大臣六部九卿公同集議將甘

肅新疆從前每年預撥估撥的餉四百數十萬兩指省解濟

臣

軍並於現協臣軍稍優各省酌撥解濟共

足成五百萬兩之數以三年爲期

臣

得於三年內盡心經理斟酌損益定爲永圖三年以後甘肅新疆軍

務既肅所擬開源節流之策亦必有成效可睹庶以前協款爲甘肅新疆用兵收復善後之需以後部撥

爲甘肅新疆常例應有之款每年以三百數十萬兩爲度自無不可

臣

本菲材疊荷 三朝恩遇忝竊

至今當茲時艱孔亟非不思仰體

朝廷憂勤惕厲之懷稍慰各省關頻施不倦之意願始謀未預晚

蓋爲難所遇多艱綢繆鮮補雖有生之日皆報

國之年而年近七旬神識衰鈍祇承

恩諭實切

悚惶謹據實備陳是否有當伏乞

皇太后

皇上聖鑒訓示施行謹

奏

軍機大臣

字寄光緒四年十一月初九日奉

上諭左宗棠奏覆陳新疆情形一摺據稱北路迪化

等處自克復以來招徠開墾戶口日增南八城地方富庶現辦開渠丈地鑄錢徵釐諸事具有端緒開設